

Abogado David Kock:

E storia di Deepak y Satish ta berdad

E ta mas logico cu esun di Joran

ORANJESTAD(AAN):

Diamars merdia DIARIO a tene entrevista cu abogado David Kock, kende ta representa Satish Kalpoe, despues cu el a worde deteni relaciona cu e caso di Natalee Holloway.

DIARIO a puntra Kock pa su reaccion, riba e hecho cu un di e otro sospechosonan, esta Joran van der Sloot a bisa cu Deepak y Satish a baha e na su cas y nan a sigui cu Natalee, despues cu nan a bisa cu nan lo bahe na su Ho-

tel.

Esaki despues cu na prome instancia e sospechosonan a declara, cu nan tres a baha e mucha muher na Holiday Inn SunSpree Resort.

DIARIO a puntra Kock tambe si e declaracion di

parti di van der Sloot lo afecta defensa pa cu su cliente.

Kock a bisa cu e declaracion lo no afecta e caso, pasobra esaki no ta cuadra cu realidad.

DIARIO a puntra Kock si e

hecho cu ora cu e tres sospechosonan a worde interoga como testigo prome biaha, nan a bisa cu nan a baha Natalee na su hotel y awor Deepak ta bisa cu nan a baha Natalee y Joran cerca di Marriott, no ta afecta credibilidad di su cliente.

Abogado Kock a bisa cu e investigacion ta den un fase hopi prematuro, sinembargo e storianan di Joran y esun di Deepak ta conflictivo y su cliente Satish ta confirma e storia di su ruman homber.

Abogado Kock a bisa DIARIO cu mirando cu e mucha muher tabata tin amistad cu Joran, ta ilogico cu e rumannan Kalpoe a core bay for di area di hotel pa bin montañia pa baha Joran na su cas, pa despues bay back pa baha Natalee na Holiday Inn, pa despues bolbe back den otro direccion, pa nan bay nan cas na Hooiberg.

Segun Kock e periodo di detencion di 8 dia lo caba Diadomingo, unda cu lo purba saca su cliente, mirando cu e cliente ta insisti cu e no sa nada di cualkier delito, cu por a worde cometi den direccion di Natalee Holloway.